

- प्रधानमंत्री नरेन्द्र मोदी कह्यो—साल 2047 ताई विकसित भारत रो सपनो सांचो करण सारु हर हलका मांय खुद रे पाण ऊबो व्हेवणो जरूरी।
- मुख्यमंत्री भजनलाल शर्मा बांसवाड़ा मांय प्रधानमंत्री रा प्रस्तावित दौरा री तैयारियां रो जायजो लीनो।
- केन्द्रीय गृहमंत्री अमित शाह रो काल जोधपुर रा दौरा रो कार्यक्रम।
- निर्वाचन आयोग प्रदेश मांय 8 हजार 840 नुवा मतदान केन्द्रां री मंजूरी दीनी— आं री तादाद बध र 61 हजार 309 व्ही।

000

प्रधानमंत्री नरेन्द्र मोदी कह्यो है के साल 2047 ताई विकसित भारत बणावण रो सपनो सांचो करण सारु हर हलका मांय खुद रे पाण ऊबो व्हेवणो जरूरी है। वे आज गुजरात रा भावनगर मांय 'समुद्र से समृद्धि' कार्यक्रम मांय बोल रह्या हा। प्रधानमंत्री कह्यो के देश साल 2047 ताई दुनिया रा समुद्री कारोबार मांय हिस्सेदारी तीन गुणा करणो तैय कीनो है। कार्यक्रम रे दौरान, प्रधानमंत्री 32 हजार करोड़ रुपया ऊं बत्ता खर्च वाळी केई परियोजनावां रो उद्घाटन कीनो अर नींव रखी। श्री मोदी 7 हजार 800 करोड़ रुपया ऊं बत्ता मोल री केई खास समुद्री परियोजनावां सागे मुंबई अंतर्राष्ट्रीय क्रूज टर्मिनल रो ई उद्घाटन कीनो। प्रधानमंत्री कह्यो के देश दुनिया री मोटी समुद्री ताकत रा तौर ऊं सामी आवण बाबत् करड़ी मेहनत कर रह्यो है अर भारत रा समुद्री तट आवता बगत मांय विकास रा प्रवेश द्वार बणेला।

000

प्रधानमंत्री नरेन्द्र मोदी रा 25 सितम्बर ने बांसवाड़ा रा प्रस्तावित दौरा री तैयारियां रो जायजो लेवण सारु मुख्यमंत्री भजनलाल शर्मा आज बांसवाड़ा पूर्या। मुख्यमंत्री छोटी सरवन रा नापला गाँव मांय माही बांसवाड़ा परमाणु ऊर्जा परियोजना री प्रस्तावित ठौड़, जठे प्रधानमंत्री ई परियोजना रा काम री नींव रखेला, रो दौरा कीनो। वे सभा री ठौड़ अर दौरा ऊं जुड़ी व्यवस्थावां रो जायजो लीनो अर जरूरी हुकम दीना। ई दौरान जनजातीय क्षेत्र विकास मंत्री बाबूलाल खराड़ी, जनता रा नुमाइंदा, मुख्य सचिव सुधांशु पंत, पुलिस महानिदेशक राजीव शर्मा अर दूजा अहलकार ई मौजूद रह्या। मुख्यमंत्री भारतीय जनता पार्टी रा अहलकारां अर कार्यकर्तावां सागे ई मुलाकात कर र कार्यक्रम री व्यवस्थावां रा बारा मांय चर्चा कीनी। मुख्यमंत्री बांसवाड़ा रा कुशलबाग स्टेडियम मांय लगायी ज्या शहरी सेवा शिविर रो दौरा कीनो अर पात्र लोगां ने नि-क्षय पोषण किट, चैक अर सर्टिफिकेट बांट्या। ई मौके वे कह्यो के प्रधानमंत्री नरेन्द्र मोदी रा जन्मदिवस रा सिलसिला मांय राख्या जा रह्या कार्यक्रम रा तैत पूरा राज्य मांय लगाया जा रह्या शहरी अर ग्रामीण सेवा शिविरां मांय अंत्योदय री भावना सांची व्हे रही है अर जनता ने प्रमाण पत्र, पेंशन अर राशन कार्ड सरीखा सुबीता तुरत मिल रह्या है।

मुख्यमंत्री कह्यो के टी.बी. मुक्त भारत अभियान रा तैत लगाया जा रह्या शिविरां मांय स्वास्थ्य जांच, मातृ अर शिशु स्वास्थ्य, एनीमिया, टी.बी. अर सिकल सेल सरीखी बीमारियां री जांच अर ईलाज रा सुबीता मुहैया कराया जा रह्या है। ग्रामीण शिविरां मांय स्वामित्व पट्टा बांटण, गिरदावरी अर ढांढा-ढोरां रे टीका लगावण सरीखा सुबीता ई दिया जा रह्या है। श्री शर्मा कह्यो के मुख्यमंत्री आयुष्मान आरोग्य योजना ऊं हर पिरवार ने 25 लाख रुपया ताई रो मुफ्त ईलाज मिल रह्यो है अर किसानां-पशुपालकां ने किसान सम्मान निधि अर गौपाल क्रेडिट कार्ड योजना रे जरिए मजबूत बणाया जा रह्या है।

000

प्रधानमंत्री नरेन्द्र मोदी रा 75वां जन्मदिन रा सिलसिला मांय चाल रह्या कार्यक्रमां रा तैत बतायी जा रही राष्ट्रीय पुरस्कार ऊं नवाजी ज्यी फिल्म "चलो जीते हैं" प्रदेश रा सिनेमाघरां अर स्कूलां मांय बतायी जा रही है। ई फिल्म रो 17 सितम्बर ऊं सुरु व्ह्यो दरसाव 2 अक्टूबर ताई चालेला।

फिल्म ने देखण वाळा इण री सराहवणा कर रह्या है। जोधपुर रा एक सिनेमाघर मांय फिल्म देख्यां पाछे एक नौजवान वां रा विचार यों बताया।

अलवर मांय फिल्म देखण पाछे लोग इण ने सीख देवण वाळी बतायी।

000

सुप्रीम कोर्ट रा मुख्य न्यायाधीश न्यायमूर्ति बी.आर. गवई आज नई दिल्ली मांय केंद्रीय प्रशासनिक न्यायाधिकरण-कैट रा 10वां अखिल भारतीय सम्मेलन रो उद्घाटन कीनो। ई मौके वे कह्यो के ओ न्यायाधिकरण सरकारी अहलकारां री काम करण री कुशलता अर न्याय ताई पहुँच मांय सुधार सारू बणायी ज्यो है। न्यायमूर्ति गवई न्यायाधिकरण रा फैसलां मांय एकरूपता अर इण रा कामकाज मांय साफगोई री जरूरत माथे जोर दीनो। मुख्य न्यायाधीश कह्यो के न्यायाधिकरण मांय आवण वाळा हर एक जणा ने ओ महसूस व्हेवणो चाहिजे के फैसलो तर्कसंगत है।

कार्यक्रम मांय कानून मंत्री अर्जुन राम मेघवाल कह्यो के न्यायाधिकरण रो हुकम सही व्हेवण रे बावजूद केई अहलकार अपील दायर करण माथे अड्या रेहवे है।

वे कह्यो के ई माथे ओजू विचार करण री जरूरत है। ध्यानजोग है के सम्मेलन रो मकसद न्यायिक अर प्रशासनिक व्यवस्था ने मजबूत बणावण सारू आगे रा उपायां माथे विचार करणो है।

मुख्य न्यायाधीश न्यायमूर्ति गवई आज बीकानेर मांय राखी ज्या एक कार्यक्रम मांय ई शामिल व्हा। **संविधान के 75 वर्ष और बाबा साहेब डॉ. भीमराव आम्बेडकर की भूमिका** मुद्दा माथे राखी ज्या ई सेमीनार मांय केन्द्रीय कानून मंत्री अर्जुनराम मेघवाल ई मौजूद रह्या। ओ कार्यक्रम कानून मंत्रालय अर राज्य विधिक सेवा प्राधिकरण री ओर ऊं महाराजा गंगासिंह विश्वविद्यालय मांय राखी ज्यो।

000

जीएसटी री रेट मांय कटौती रो फायदो सीधो ग्राहकां ताई पूगावण सारू रेल मंत्रालय रेलगाड़ियां अर रेलवे परिसर मांय मिलण वाळा बोतल अर थैलियां मांय मिलण वाळा पाणी रा मोल मांय कटौती रो ऐलाण कीनो है। इण रे तैत, रेल नीर अर दूजा ब्रांड री एक लीटर पाणी री बोतल री कीमत पंद्रह रुपया ऊं घटा र चौदह रुपया कर दीरीजी है। आधा लीटर पाणी री बोतल रो मोल ई दस ऊं घटा र नौ रुपया कर दियो ज्यो है। ई महीना री 22 तारीख ऊं बोतलबंद पाणी नुवी कीमतां माथे मिलण लागेला। ध्यानजोग है के जीएसटी परिषद् 3 सितम्बर ने जीएसटी सुधारां रो ऐलाण कीनो हो। अ सुधार परसों ऊं लागू व्हे जावेला।

000

उपभोक्ता मामलात विभाग नुवा जीएसटी सुधारां रा तैत राष्ट्रीय उपभोक्ता हेल्पलाइन माथे जीएसटी शिकायत निवारण रो सुबीतो मुहैया करायो है। उपभोक्ता मामलात, खाद्य अर सार्वजनिक वितरण मंत्रालय रे मुजब जीएसटी री सोमवार ऊं नुवी रेट अर छूट लागू व्हां पाछे ग्राहकां री शिकायतां रो निपटारो एकीकृत शिकायत निवारण तंत्र-**आईएनजीआरएम** पोर्टल माथे सरू करी ज्यो है। मंत्रालय रे मुजब ग्राहक अब मुफ्त नंबर 1 9 1 5 या पोर्टल रे मार्फत 17 भाषावां मांय शिकायत दर्ज करा सके है।

000

केन्द्रीय गृह अर सहकारिता मंत्री अमित शाह रो काल जोधपुर आवण रो कार्यक्रम है। गृहमंत्री वठे पारसमल बोहरा नेत्रहीन महाविद्यालय रो भवन बणावण रा काम री नींव रखेला। वां रो केन्द्रीय शुष्क क्षेत्र अनुसंधान संस्थान-काजरी रा अहलकारां अर वैज्ञानिकां सागे बातचीत रो ई कार्यक्रम है। और जाणकारी म्हाणा खबरनवीस ऊं-

दूजी कानी केन्द्रीय संस्कृति मंत्री गजेन्द्र सिंह शेखावत आज जोधपुर पधार्या। वे राज्य स्तर री अंडर-19 क्रिकेट चैंपियनशिप जीतण वाळी जोधपुर री टीम रा खिलाड़ियां सागे मुलाकात कीनी। श्री शेखावत खिलाड़ियां रा उजळा भविष्य री कामना करता थकां वां ने शुभकामनावां दीनी।

000

डीग जिला री स्कूलां मांय बच्चां ने प्रायोगिक शिक्षा देवण सारू प्रयोगशालावां बणायी जावेला। ई काम माथे करीब सवा सात करोड़ रुपया खर्च कर्या जावेला। जिला रा सगळा ब्लॉक री 13 सरकारी सीनियर सैकण्डी स्कूलां मांय 24 प्रयोगशालावां बणावण री प्रशासनिक मंजूरी दीरीजी है। म्हाणी खबरनवीस बतायो के आं मांय 8 भौतिक विज्ञान, 9 रसायन विज्ञान अर 7 जीव विज्ञान री प्रयोगशालावां शामिल है।

000

प्रदेश मांय मतदान केन्द्रां री तादाद बध र 61 हजार 309 व्हे गयी है। निर्वाचन आयोग 8 हजार 840 नुवा मतदान केन्द्र खोलण री मंजूरी दे दीनी है। मुख्य निर्वाचन अधिकारी नवीन महाजन आ जाणकारी दीनी। वे बतायो के निर्वाचन आयोग रे मुजब एक मतदान केंद्र माथे बत्ता ऊं बत्ता 1 हजार 200 जणा वोट दे सके है, जद के प्रदेश मांय 17 हजार 829 मतदान केंद्र ऐड़ा हा जठै वोट देवण वाळां री तादाद 1 हजार 200 ऊं बत्ती ही।